

Političari trebaju učiti od Centralne banke



Finansijski sustav BiH se pokazao otpornim u svjetlu svjetske ekonomske krize, izjavio je visoki predstavnik i posebni predstavnik EU Valentin Inzko na ekonomskoj konferenciji danas u Sarajevu. Inzko je pohvalio Centralnu banku i izjavio da politički lideri u BiH trebaju prihvatići načelo zdravog razuma koje finansijski organi primjenjuju sa uspjehom.

“Nemoguće je dovoljno snažno istaknuti ključnu ulogu koju su imali guverner Kozarić, ministar Vrankić i njihovi timovi”, rekao je Inzko. “Poruka koja je upućena iz Centralne banke u periodu najvećih poremećaja je bila trezvena, odmjerena i dosljedna.”

Navodeći da “je povjerenje u domaći bankarski sustav održano kroz blagovremene i pragmatične mjere koje su provedene uz visok stupanj zdravog razuma i uz minimalnu pometnju,” visoki predstavnik i posebni predstavnik EU je dodao da je “Bosni i Hercegovini očajnički potreban ovakav pristup i daleko izvan finansijskog sektora.”

Inzko je dodao da je imperativ održavanje operativne neovisnosti i institucionalnog kredibiliteta Centralne banke. Također je pozvao nadležne organe da racionaliziraju i moderniziraju bankarski nadzor u BiH.

“Već niz godina postoje planovi za konsolidiranje agencija za bankarstvo u zemlji, smanjenje birokracije i povećanje efikasnosti. To će ojačati zaštitne mehanizme za deponente i dati snažan poticaj bankarskom sektoru u cijelosti, što može pomoći u nastojanjima da se umanjuje kamatne stope,” rekao je

visoki predstavnik i posebni predstavnik EU.

Inzko je istaknuo da bi ova reforma, ako bi do nje došlo u narednim mjesecima, "pomogla da se stimulira ekonomija – a to znači nova radna mjesta, što je jedna od oblasti u kojoj je globalna recesija prouzročila ozbiljne probleme u Bosni i Hercegovini, obzirom da su desetine tisuća obitelji pogodene gubitkom poslova od kraja prošle godine do danas".

Visoki predstavnik i posebni predstavnik EU je istaknuo da je ova i druge ključne reforme od kojih bi građani imali koristi stavljena na čekanje zbog trogodišnje političke krize.

"Tri godine je preduž period da se ne uradi ništa. Desetine tisuća izgubljenih radnih mjesta je previsoka cijena. Zastoj na putu u Europu je previše štetan. Sada je pravo vrijeme da se prebrodi kriza i da se nastavi sa realiziranjem već preduž odgađanih reformi" rekao je Valentin Inzko. "Politički lideri u ovoj zemlji moraju naučiti nešto od Centralne banke. Vrijeme je da dobijemo i odgovornu politiku, baš kao i odgovorne financije."

Puni tekst obraćanja visokog predstavnika i posebnog predstavnika EU dostupan je na adresama www.ohr.int i www.eusrbih.eu.